

REGLUR

um gerð og staðsetningu skilta í Vestmannaeyjum.

I. KAFLI

Gildissvið, markmið, skilgreiningar og staðsetning.

1. gr.

Gildissvið.

- 1.1 Reglur þessar eru settar með heimild í 6. mgr. 37. gr. skipulags- og byggingarlaga nr. 73/1997 og gr. 6.2. í byggingarreglugerð nr. 441/1998. Um skilti utan þéttbýlis gilda einnig ákvæði 35. og 43. gr. náttúruverndarlaga nr. 44/1999 og um mannvirki á vegsvæðum gilda ákvæði 33., 34. og 35. gr. vegalaga nr. 45/1994.
- 1.2 Reglurnar gilda um hvers konar skilti og auglýsingar sem sótt er um leyfi fyrir hjá embætti byggingarfulltrúa eða umhverfis- og skipulagsráði, eftir gildistöku reglna, svo og um breytingar á reglum.
- 1.3 Undanþegin ákvæðum þessum eru þó:
 - skilti sem gefa til kynna heiti, starfsemi, vöru, þjónustu og afgreiðslutíma fyrir tækja/stofnana á viðkomandi lóð og eru eigi stærri en 1,5 m².
 - auglýsingar á íþróttaleikvöngum enda snúi þær inn á við að leikvanginum.
 - auglýsingar sem eru órjúfanlegur hluti af hönnun byggingar.
 - bráðbirgðaskilti sem veita upplýsingar um nýbyggingar, breytingar eða viðgerðir á mannvirkjum séu þau staðsett á viðkomandi lóð og eigi stærri en 3,0 m². Á þessum skiltum skulu aðeins koma fram upplýsingar varðandi mannvirkid, þær framkvæmdir sem um er að ræða, upphafstíma og verklok framkvæmdanna, og þá sem að þeim standa.
 - lausaskilti (skilti sem ekki eru með varanlegum festingum við jörð eða mannvirki, t.d. gormaskilti) sem að jafnaði standa aðeins á opnunartíma starfsstöðvar. Stærð þeirra skal ekki vera meiri en 0,75 m².
- 1.4 Reglurnar öðlast gildi við samþykkt bæjarstjórnar Vestmannaeyja.

2. gr.

Markmið.

Að hafa stjórn á stærð, uppsetningu og staðsetningu skilta.

3. gr.

Skilgreiningar.

Með orðunum auglýsing og skilti og öðrum samsvarandi orðum er í reglum þessum átt við hvers konar texta, myndir eða myndverk, hreyfanleg eða föst, sem komið er fyrir til lengri eða skemmri tíma á einkalóðum, opinberum svæðum eða mannvirkjum, hvort sem er á spjöldum, borðum eða máluð á húsveggi eða með öðrum sambærilegum tilfæringum og ætlað er að vekja athygli almennings á vörum, þjónustu eða starfsemi hvers konar, hvort sem er á viðkomandi stað eða annars staðar.

4. gr.

Staðsetning.

Skilti einkaaðila skulu staðsett innan lóðarmarka eigandans nema í sérstökum með undantekningum, t.d. skilti með upplýsingum um bifreiðastæði. Við staðsetningu skal þess

gætt að þau gangi ekki á rétt nágrannans. Gæta skal þess að þau skapi ekki slysaættu. Leyfi lóðarhafa þarf til þess að koma skilti og/eða auglýsingu fyrir. Einnig skulu þau uppfylla kröfur í 72. gr. byggingarreglugerðar nr. 441/1998.

II. KAFLI

Umsóknir og leyfisveitingar.

5. gr.

Umsóknir.

Hver sá sem óskar leyfis til að koma fyrir skilti eða auglýsingu skal skila skriflegri og undirritaðri umsókn til byggingarfulltrúa.

Hverri umsókn skal fylgja:

- Málsett afstöðumynd, útlitsteikningar og sneiðingar í mælikvarðanum 1:100 eða 1:200 auk texta sem á skiltinu á að vera sem og aðrar upplýsingar sem taldar eru nauðsynlegar. Teikningar þessar skulu færðar inn á aðaluppdrátt lóðar.
- Ljósmynd sem sýnir hvar skilti skal komið fyrir.
- Greinargerð um uppsetningu, festingar og gerð skiltis sem og viðurkenningu Rafmagnseftirlits ríkisins þar sem það á við (t.d. veltiskilti, ljósaskilti o.s.frv.).
- Nafn og heimilisfang og kennitala þess sem setur upp skiltið.
- Undirritað samþykki lóðarhafa ef hann er annar en umsækjandi sem og annarra lóðar-eigenda og/eða rekstraraðila ef fleiri eru en einn.

6. gr.

Leyfisveitingar.

Óheimilt er að setja upp hvers konar skilti og auglýsingar í Vestmannaeyjum nema að fengnu leyfi byggingarfulltrúa eða umhverfis- og skipulagsráðs.

Byggingarfulltrúa ber innan þrjátíu daga frá dagsetningu umsóknar annaðhvort að afgreiða hana eða ef umsóknin er ófullnægjandi vekja athygli umsækjenda á því sem ábótavant er. Vafaatriðum varðandi leyfisveitingar má vísa til umhverfis- og skipulagsráðs. Umsækjandi um skilti getur einnig áfrýjað til ráðsins ef hann telur úrskurð byggingarfulltrúa ekki réttmætan. Bráðabirgðaskilti er ekki heimilt að setja upp fyrir en 8 vikum fyrir viðburð og þau skal taka niður eigi seinna en viku eftir hann. Leyfisgjald skal fara eftir gr. 27 í byggingarreglugerð. Ef umsækjandi um leyfi greiðir ekki leyfisgjald eða sækir ekki byggingarleyfisbréf innan 12 mánaða frá veitingu þess fellur það úr gildi. Leggja verður fram ný skjöl ef leyfis er óskað á ný.

Byggingarfulltrúaembættið innheimtir leyfisgjald skilta (fellur undir afgreiðslu- og fyrirspurnargjald byggingarfulltrúa).

7. gr.

Eftirlit.

Eftirlit með skiltum og leyfum fyrir þeim verði í höndum byggingarfulltrúa í umboði umhverfis- og skipulagsráðs.

8. gr.

Eldri skilti.

Byggingarfulltrúi getur krafist þess að eldri skilti sem sett hafa verið upp án leyfis, verði fjarlægð án fyrirvara, ef ætla má að þau hafi verulega truflandi áhrif á umferð eða valdi umhverfisspjöllum.

III. KAFLI

Refsi- og gildistökuákvæði.

9. gr.

Refsiákvæði.

Verði tilmælum byggingarfulltrúa ekki sinnt getur umhverfis- og skipulagsráð beitt ákvæðum II. kafla byggingarreglugerðar nr. 441/1998.

Eldri reglur um skilti falla úr gildi við gildistöku nýrra.

Samþykkt í umhverfis- og skipulagsráði Vestmannaeyja, 7. desember 2005.

Staðfest í bæjarstjórn 8. desember 2005.

Vestmannaeyjum, 8. desember 2005.

Sigurður Smári Benónýsson,

skipulags- og byggingarfulltrúi Vestmannaeyja.

B-deild – Útgáfud.: 20. desember 2005